



Komunikadu Imprensa

Períodu : Setembru 2011
Edisaun : 02 Setembru 2011

JSMP kontinua hala'ó treinamentu iha Suco Usitaku, Distritu Oe-cusse

Iha loron 19 fulan Agostu tinan 2011, *Judicial System Monitoring Programme* (JSMP) liu husi Unidade Asisténsia Legál ba Vítima (*Victim Support Service*) ka VSS, hala'ó treinamentu ba lideransa komunitária, grupu feto, representante grupu juventude iha Suco Usitaku, Sub Distritu Nitibe, Distritu Oe-cusse. Total partisipante sira hamutuk ema nain 39 kompostu husi mane ema nain 36 no feto nain 3.

Materi treinamentu sei nafatin hanesan treinamentu sira ne'ebé halo iha tempu sira liu ba. Materia hirak ne'e inklui Kódigu Penál, Kódigu Prosesu Penál husi prespetiva vítima violénsia bázeia ba jéneru, Lei No.7/2010 konabá Lei Kontra Violénsia Doméstika, nomós Lei Nú. 3/2009 konabá Lideransa Komunitária. Aliende materia konabá kuadru júridiku penál no prosesuál, treinamentu ne'e mós intruduz provizaun balun iha Konvensaun Internasionál ratifikadu sira, liu-liu Konvensaun konabá Halakon Forma Diskriminasaun Hotu-Hotu Hasoru Feto (CEDAW). Nune'e mós artigu balun iha Konstituisaun da Repúblika ne'ebé defini konabá Prinsipiu Estadu Direitu no Prinsipiu Igualdade Jéneru. Kna'ar ka papel autóridade judisiariu (Juiz no Prokurador) nomós ajente prosesuál sira hanesan Polísia - VPU, Defensór Públiku no Advogadu mós kobre iha treinamentu ida ne'e.

Tuir Diretór Ezekutivu JSMP Luis de Oliveira Sampaio haktuir katak *Suco Usitaku nu'udar Suco ne'ebé dok husi vila tanbá ne'e JSMP/VSS desidi hodi hala'ó treinamentu iha Suco refere ho razaun katak komidade, lideransa komunitária, grupu feto, durante ne'e sira seidauk hetan treinamentu klean ba sistema justisa formal iha Timór Léste, no liu husi treinamentu ne'e bele aumena tan sira nia kuñesimentu ba lalaok lei formal liu-liu ba kazu krime violénsia doméstika, violasaun seksuál, abuzu seksuál atu nune'e iha futuru ita nia lideransa komunitária sira bele separa kazu hirak ne'e hodi halo mediasaun iha nivel lokal.*

Iha parte seluk xefe suco Usitaku Sr. Julio Cael *iha nia abertura haktuir katak informasaun konabá lei importante tebes nia suco tanbá ne'e, treinamentu ida ne'e ita bele aproveita hodi ita bele husu buat barak ba JSMP/VSS tanbá sira serbisu iha área lei nian atu nune'e ba futuru ita bele hatene konabá lalaok lei nian iha ita nia rai Timór léste atu ita bele separa sistema tradisional no formal nian wainhira ita hasoru problema iha ita nia suco.*

Observasaun JSMP nota katak partisipante sira barak kuaze iha antusiasmu atu husu pergunta ba lalaok sistema judisiáriu iha Timór Léste li-liu ba separasaun kompetensia ba kazu sivíl no krime atu nune'e wainhira iha kazu ruma ne'ebé akontese sira iha kuñesimentu ona hodi bele prosesu tuir tipu ka natureza husi kazu ne'e. Sira mós rekuñese katak durante ne'e seidauk iha ONG ida maka tama iha sira nia suco hodi fó treinamentu konabá lei nian, partisipante sira subliña tan katak sistema justisa tradisional dala ruma laiha justisa tanbá autór ne'ebé iha karau barak sempre selu deit indemnizasaun. Ne'e signifika

katak kuandu ema iha karau barak bele halo tuir nia hakarak deit, tanbá ne'e maka wainhira akontese kazu hanesan ne'e sira sei la rezolve maibé sei lori prosesu tuir sistema justisa formal.

JSMP espera katak treinamentu ne'e bele lori mudansa signifikativu ba lideransa komunitária, grupu fetu, juventude atu kompriende konabá sistema justisa formal ne'ebé lao iha Timór Leste, Prosesu ne'e ho espetativa ida katak iha futuru sira bele lao tuir/banati tuir, karik iha kazu ruma ne'ebé mosu iha sira nia suco laran, liu-liu ligadu ho krime violénsia bázeia ba jéneru, hanesan kazu violénsia doméstika, violasaun seksuál, abuzu seksuál, tanbá treinamentu ida ne'e hanesan pasu ida hodi hasa'e konsiensia públiku ba sistema justisa formal ne'ebé Timór Leste adopta.

Treinamentu ne'e realiza tanbá hetan tulun finanseiru husi Governu Australia liu husi Justice Facility.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Email; Luis@jsmp.minihub.org

Landline; 3323883/7295795